



N° 7350
Entrée le 09.12.2022
Déclarée recevable
Président de la Chambre des Députés
(s.) Fernand Etgen
Luxembourg, le 09.12.2022

Groupe parlementaire

Här Fernand Etgen
President vun der Deputéiertechamber
19, um Krautmaart
L-1728 Lëtzebuerg

Lëtzebuerg, den 8. Dezember 2022

Här President,

esou wéi d'Chambersreglement et virgesäit, bieden ech lech, dës parlamentaresch Fro un den Här Staatsminister an d'Madamm Finanzminister weiderzeleeden.

Déi staark Inflatoun bedeit fir vill Bierger net nëmmen en Akommesverloscht, mee am Zesummespill mat den niddregen an zum Deel negativen Zënsen och e staarke Verméigensverloscht. Wéi net zulescht d'Entwécklung vun de Logementspräisser aus de leschte Jore weist, hu vill Lëtzebuerger Bierger déi lescht Jore probéiert, sech géint dës Entteegung ouni Gesetz ze schützen, andeems si hir Geldverméigen an Immobilien ëmgeschicht hunn.

Weider Méiglechkeeten fir sech géint en entspreichende Verfall vun enger obligatorescher Wäring ze schützen leien zum Beispill am Investissement an Aueren, Bijouen oder Konschtwierker a méi rezent och déi lukrativ mee volatil Kryptowäringen. An der internationaler Presse ass ze liesen, datt sech beim EU-Sommet zu Bréissel vum 7. Dezember op eng Limitt fir Bezuelunge mat Boergeld vun 10.000 Euro gëeenegt gouf. Weider soll ënner anerem genee den Handel mat Kryptowäringen, Aueren a Bijouen nach méi streng iwwerwaacht ginn.

An deem Zesummenhang géife mir der Regierung gär dës Froe stellen:

- 1) Huet d'Regierung dës Decisioun beim Sommet zu Bréissel ënnerstëtzt? Falls jo, hält si et fir opportun, de Schutz vum eegene Verméige fir d'Bierger an der aktueller Krisesituatioun nach méi schwéier ze maachen? Kann d'Regierung preziséieren, wéi déi willkürlech Limitt vun 10.000 Euro fir mat Boergeld ze bezuelen, sech mam Recht vun de Bierger op Privatsphär verdréit?
- 2) Kann d'Regierung matdeelen wéi héich d'Geldverméige vun de Lëtzebuerger Bierger an de Joren 2010 bis 2020 duerchschnëttlech reell insgesamt verzénst war a wéi ee Gesamtmontant doduerch erzeegt gouf, respektiv verluer gaangen ass?
- 3) Wéi beurteelt d'Regierung d'Gefor, datt besonnesch d'Finanzplaz London vun enger Iwwerreguléierung vum Handel mat Kryptowäringen an anere Verméigensgëgestänn an der EU profitéiert?

Mat déiwem Respekt,


Fernand Kartheiser
Deputéierten


Roy Reding
Deputéierten



Äntwert vun der Finanzministesch op d'parlamentaresch Fro n°7350 vum 9. Dezember 2022 vum Här Deputéierten Fernand Kartheiser an vum Här Deputéierten Roy Reding.

D'Europäesch Kommissioun huet den 20. Juli 2021 eng Rei Mesuren am Kampf géint de Blanchiment an d'Finanzéierung vum Terrorismus proposéiert. Dëse sougenannten « AML Paquet » besteet aus Proposen fir eng nei Direktiv (AMLD6) an dräi direkt applikabelen Reglementer (AMLR, AMLAR, TFR).

Den Artikel 59 vum zukünftegen EU-Reglement « AMLR » gesäit aktuell e Plaffong vu Borgeld Payermenter vun 10.000 Euro vir, mat der Intentioun, Kriminellen een Instrument ewech ze huelen, fir héich Montanten, déi aus illegalen Aktivitéiten stamen, ze wäschen.

Et bleift ze präziséieren, dass dës Limitt vun 10.000 Euro sech nëmme fir Payermenter un Professioneller (dat heescht Persounen, di Produiten oder Servicer ubidden) applizéiert. De Plaffong gëllt net fir Payermenter tëscht Privatpersounen an och net fir Payermenter oder Depote vu Boergeld bei enger Bank.

Déi aktuell Propos fir een Plaffong vu Boergeld stellt een Kompromëss duer den erlaabt, dass Länner, déi haut scho méi streng sinn oder méi streng wëllen ginn, och méi niddereg Plaffonge kënnen aféieren.

Dei inter-institutionell Negociatioune tëscht de Member-Staaten, dem EU Parlament an der Europäescher Kommissioun iwwert den sougenannten « AML Paquet » sinn nach net ofgeschloss, an dofir gëtt et och nach keng final Decisioun iwwer den Artikel 59 vum zukünftegen AMLR.

Betreffend d'Héicht vum Geldverméige an der duerchschnëttlecher Verzënsung, verweist d'Regierung op d'Informatiounen, déi fräi zougänglech op dem Internetsite vun der lëtzebuerger Zentralbank (www.bcl.lu) ënnert der Rubrik "Statistiques > Tableaux statistiques" ze fannen sinn.

Detailléiert Informatiounen betreffend d'Zënszäz. déi d'lëtzebuerger Banken op Dépôten bezuelen ginn vun der BCL an dem Tableau "03.02 Taux d'intérêt appliqués par les établissements de crédit luxembourgeois aux dépôts et crédits en euros – encours" publizéiert. Informatiounen bezüglech Dépôten vun lëtzebuerger Haushälter bei lëtzebuerger Banken sinn am Tableau "11.13 Dépôts reçus par les établissements de crédit - par type et contreparties" vun der BCL ze fannen.

Eng effikass Finanzreglementatioun kann allgemeng net als Kompetitivitéitsnodeel ugesi ginn, mee ass en Garant fir d'Stabilitéit an d'Glawierdegkeet vum Finanzsecteur.

D'Europäesch Unioun (EU) gëtt sech mam néien AML Paquet an dem MiCA-Reglement en harmoniséiert a komplett Reegelwierk wat d'Emissioun an den Handel mat Kryptoaktiva an der EU u sech reguléiert an den Risiken vun Geldwäsch a Finanzéierung vum Terrorismus an dem Beräich entgéintwierkt. D'EU leescht soumat Pionéieraarbecht a sëtzt zudeem déi international Ufuerderungen vum GAFI iwwer Kryptoaktiva integral ëm. Groussbritannien huet sech engagéiert als Member vum GAFI déi selwecht international Ufuerderungen ze respektéieren.

Lëtzebuerg, den 13. Januar 2023

D'Finanzministesch

(s.) Yuriko Backes